

BIH



Ministarstvo komunikacija i saobraćaja BiH: Uputili smo Strabagu zahtjev o mogućnosti mirnog rješavanja spora

Klix.ba
prije 15 min

0 0

Ministarstvo komunikacija i saobraćaja Bosne i Hercegovine reagovalo je na informaciju Pravobranilaštva BiH objavljenu u tekstu na portalu Klix.ba, a koja je dostavljena Parlamentarnoj skupštini Bosne i Hercegovine na razmatranje. Naime, riječ je o neažuriranoj informaciji koja je postavljena na stranicu državnog parlamenta.



Foto: Arhiv/ Klix.ba

Iz Ministarstva komunikacija i saobraćaja ističu kako je neosnovan, netačan, neistinit i proizvoljan dio spornog teksta članka, u kojem se navodi: "Uprkos tome što je još u februaru Vijeće ministara BiH naložilo Ministarstvu komunikacija i saobraćaja BiH i Pravobranilaštvu BiH da pokrenu pregovore s tužiteljem Strabagom AG radi eventualnog mirnog rješenja spora i pokušaja zaključivanja vansudske nagodbe, Ministarstvo komunikacija i saobraćaja nikada nije odgovorilo na zahtjev Pravobranilaštva za organizovanjem sastanka na kojem bi se dogovorilo preduzimanje neophodnih aktivnosti".

U demantu navode da je dana 05.04.2016. godine, a postupajući upravo po Zaključku Vijeća ministara Bosne i Hercegovine sa 45 sjednice Vijeća ministara održane 26.02.2016. godine, zamjenik ministra komunikacija i prometa BiH Saša Dalipagić je održao sastanak sa pravobraniteljem BiH gospodinom Mariofilom Ljubićem s ciljem utvrđivanja daljnjih koraka za postupanje u predmetu koji se nalazi pred arbitražnim sudom, po tužbi „Strabag AG“ protiv Ministarstva komunikacija i prometa BiH. Ministarstvo i Pravobraniteljstvo su, postupajući po prethodno navedenom zaključku, uputili zajednički dopis Strabag AG na izjašnjenje o mogućnosti mirnog rješavanja spora. U ovoj fazi Ministarstvo očekuje zaprimanje odgovora od Strabag AG, radi poduzimanja daljnjih koraka. Vijeće ministara BiH će donijeti konačnu odluku o prijedlogu nagodbe te konačnu odluku eventualnoj nagodbi stranaka u ovom postupku.

U odnosu na objavljeni podnaslov pod nazivom: „Ministarstvo komunikacija i saobraćaja BiH nije u stanju održati sastanak“, Ministarstvo ostaje pri svim navodima istaknutim u prethodnom dijelu demantija, bez potrebe daljnjeg obrazlaganja.

Nadalje, postupajući po drugom zaključku Vijeća ministara s navedene sjednice, zamjenik ministra komunikacija i prometa BiH Saša Dalipagić je u okviru sastanka održanog s predstavnicima Ministarstva pomorstva prometa i infrastrukture Republike Hrvatske, razgovarao i o mogućnosti rješavanja pitanja regresnog zahtjeva u visini od 535.000,00 EUR upućenog od strane HAC-a prema Ministarstvu komunikacija i prometa Bosne i Hercegovine, te je zajednički zaključak da postoji obostrani interes Bosne i Hercegovine i Republike Hrvatske za mirno rješavanje pitanja regresnog zahtjeva. U tom pravcu je zaključeno da će se sačekati imenovanje nove uprave HAC-a, nakon čega bi se trebao održati sastanak po ovom pitanju između predstavnika Ministarstva komunikacija i prometa BiH, Pravobraniteljstva BiH i Hrvatskih auto-cesta.

Ističu da je Dalipagić 05.05.2016. godine dao intervju jednom od bh. internet portala koji je prenesen u većini značajnijih tiskanih i internet medija u BiH, gdje je navedena problematika detaljno pojašnjena.

U odnosu na dio natpisa iz podnaslova teksta spornog članka: „Hrvatska se na vrijeme nagodila“, u kojem se navodi da: "S obzirom na to da su Ministarstvo komunikacija i saobraćaja BiH i HAC odbijali preuzeti obaveze Strabag se obratio Stalnom arbitražnom sudu u Hagu, Ministarstvo ima potrebu još jednom istaknuti sljedeće:

Strabag AG je 2012. godine pokrenuo postupak pred Vijećem za rješavanje sporova da bi isto Vijeće donijelo Odluku kojom Ministarstvo i HAC obvezuju da Strabagu AG podmire stvarno nastale troškove i zajamčenu dobit u ukupnom iznosu od 1.177.263,60 eura.

Vijeće ministara Bosne i Hercegovine, u prethodnom sazivu, je na 33. sjednici održanoj 21.12.2012. godine donijelo Zaključak kojim ne prihvaća Odluku Vijeća za rješavanje sporova pa je Ministarstvo komunikacija i prometa, na čijem je čelu tada bio ministar Damir Hadžić, postupajući po navedenom zaključku izvijestilo „Strabag“ o nezadovoljstvu odlukom VRS-a. Strabag je pred Stalnim sudom za arbitražu u Hagu pokrenuo spor sa zahtjevom za izvršavanje Odluke VRS-a, zahtijevajući da mu Ministarstvo isplati iznos od 642.263,60 eura, na ime naknade štete zbog raskida Ugovora, a koji iznos predstavlja razliku između iznosa uplaćenog od strane HAC i iznosa koji su temeljem Odluke VRS-a trebali platiti Ministarstvo komunikacija i prometa BiH i HAC.

HAC je 12.08.2013. godine zaključio nagodbu sa Strabag-om isplativši iznos od 535.000,00 eura, o čemu je 30.01.2014. godine izvijestio Ministarstvo.

"Pozivajući se na činjenicu kako je Pravobraniteljstvo BiH uputilo Ministarstvu komunikacija i prometa BiH akt 14. ožujka 2016. godine, kojim je Pravobraniteljstvo pozvalo Ministarstvo komunikacija i prometa BiH da se u što skorije vrijeme održi odgovarajući radni sastanak na kojem bi se dogovorilo preduzimanje neophodnih aktivnosti radi realizacije zaključka sa 45. sjednice Vijeća ministara BiH, te da kako se navodi, „do dana pisanja ove informacije nismo dobili odgovor od Ministarstva“, držimo nužnim još jednom napomenuti kako se radi o aktu i nacrtu Informacije pripremanim istoga datuma, dakle 14.03.2016. godine, dakle skoro dva mjeseca prije objave spornog članka, te da se u međuvremenu održao niza aktivnosti koje nisu sadržane u istoj", piše u demantiju.